



**Inatsisartut inatsisaanni Inatsimmut § 2, stk. 1 "nipilersornermi tunisassiornerup" ilassuteqaatigineqarnissaa pillugu Naalakkersuisut siunnersuuteqaqqullugit peqquneqarnissaannut Inatsisartuni aalajangiiffigisassatut siunnersuut, nunami inuutissarsiornerup siuarsarneqarnissaanut atatillugu nipilersornermi tunisassioriaatsip siuarsarneqarnissaa anguniarlugu matumani nipilersortartut inatsisitigut illersugaasumik atuisinnaanissaat anguniarlugu inuussutissarsiornermi aningaasaliiffigineqarnissamut periarfissaqarnerannut ersarissaanerussaaq.**

(Inatsisartunut Ilaasortaq Aqqalu C. Jerimiassen, Atassut)

Inatsisartunut ilaasortap Aqqalu C. Jerimiassenip aaliangiiffigisassatut siunnersuutaanut, qulani pineqartumut soqutiginarluinnartumut pingaaruteqarluinnartumullu qujarialluta, matumuuna Inuit Ataqatigiinniit imaattumik oqaaseqaateqassaagut.

Naak eqqumiitsuliortortatta, ullumikkut atugaat, qangamut naleqqiullugit pitsaanerungaaraluartut, taamaattoq nassuerutigissavarput ullumikkut tikillugu iliuuserisimasagut suli naammannerujussuarmata, pitsaanngorsaaqqinnissatsinnullumi aamma suli periarfissarpassuaqannguatsiarunartoq aammattaaq isumaqatigiissutigisinnannguatsiarunarlutigu.

Taamaattumik tamanna pillugu immikkut ittumik, inatsisartunut ilaasortaq Aqqalu C. Jerimiassen qutsavigerusupparput, nipilersortartut atugaat pillugit pitsanngorsaataasinnaasumik siunnersuuteqarneranut.

Nipilersortartut atugaannik pitsanngorsaataasinnaasut suulluunniit tamaasa Inuit Ataqatigiinniit qujarullugillu peqataaffigalugit suleqataaffigissavagut soorluttaaq aamma taamaaliortuartarsimasugut.

Aqqalu C. Jerimiassenip siunnersutaa ingerlaannaq taparserlugulu itigartinngikkaluarlutigu ataatsimiititaliamut ingerlateqqaarusupparput. Ataatsimiititaliamut ingerlateqqipparput tassani apeqqutit assigiinngitsut qulaajarneqarsinnaaqqullugit;

1. Nipilersornermi tunisassioriaaseq siuarsarneqassappat, ilumut taava pisariaqarnerpa nipilersornermik tunisassiornerup - tassa qallunaatut musikindustriam taaneqarsimasut – inatsimmut pineqartumut ilanngunneqarnissaat? Periarfissaariinnginnerpa inatsisaasup iluani pineqartut qinnuteqarnissaminnut?
2. Musikindustri – nipilersornermik tunisassiornerup qanoq paasineqassava? Qallunaatoorlugulu qanoq definererneqassava? Nipilersuusuaq ataaseq musikindustriua?

3. Assersuutigalugu Nanook-kkut, Zikaza-kkut, Siissisoq-kkut, nipilersoqatigiippasuillu kikkulluunniit § 1 malillugu qinnuteqarsinnaalissappat? Imaluunniit § 1-ip nipilersoqatigiit kikkulluunniit matuppai qinnuteqarnissamut?

Tassami siunertaq anguniagarlu nipilersortartunut kikkunnulluunniit iluaqutaasinnaappat siunertaq anguniagarlu tamanna assortoruminaappoq. Tassa kisianni nipilersortartunut kikkunnut aamma nipilersortartunut sorlernut tamanna sukut qanorlu iluaqutaasinnaassanersoq paasilluaqqaarusunnarpoq. Tassami....

**Nunami inuussutissarsiutitut tunngatillugu inuussutissarsiornermik siuarsaaneq pillugu Inatsisartut inatsisaat nr. 20, 3. december 2012-meersoq malillugu § 1-mi ilaatigut ima allassimasoqarmat:**

**“§ 1.** Aningaasanik immikkoortitsineqassaaq inuussutissarsiornermi pilersaarutitut inuiaqatigiit aningaasarsiorneranni iluaqusiinnaasutut nalilerneqartunut, assersuutigalugu tunisassiornerunermik suliffissanillu amerlanerulersitsinernik kinguneqartut, tapiissuteqarfigineqarnissaat siunertaralugu tapiissutitigut aaqqiissutinik aningaasalersuisussanik. *Imm. 2.* Ingerlatsinermut namminermut tapiissuteqartoqarsinnaanngilaq.”

Malugalugu una ima allasimasoq; tassa siunertanut makkununga taamaallaat tapiissuteqartoqarsinnaammat; “inuiaqatigiit aningaasarsiorneranni iluaqusiinnaasutut nalilerneqartunut assersuutigalugu tunisassiornerunermik suliffissanillu amerlanerulersitsinernik kinguneqartut,”

Taamaattorli aamma paaserusunnarsinnaavoq inatsimmi qulaani pineqartumi § 2 malillugu nipilersornermik tunisassioqartut inatsimmut qulaani pineqartumut ilaasutut taaneqareersinnaannginnerpat? Taamaattorli aamma § 2 immikkoortoq siullermi ilaareersutut taaneqareersinnaagaluarlutik taamattoq immikkoortup aappaani periarfissanut allanut mattunneqar-tutut ippat, tassami immikkoortumi 2-mi ima allassimasoqarpoq;

*“Imm. 2.* Inatsisartut inatsisaat manna malillugu siunertanut inatsisit allat malillugit tapiissuteqartarnermi aaqqiissutinut ilaareersunut tapiissuteqartoqarsinnaanngilaq.”

Tassa imaappoq immikkoortoq taanna nr.2 uanga imatut paasivara; Assersuut: Nipilersortartuuvunga nioqqutissaq anguniagarluunniit X pisiariniarlugu anguniarluguluunniit kulturikkut aningaasaateqarfinnut qinnuteqarsimallunga akuerineqarsimaguma, taava inatsimmut uunga pineqartumut qinnuteqarsinnaajunnaassaanga.

Ajunngitsumik paasisimanerpara imaluunniit paatsoorsimanerpunga? Naaatsumik oqaatigalugu apeqqut suliassarlu una assorsuaq soqutiginarluinnarpoq aammalu apeqqutinik assigiinngitsunik akineqartariaqartunik qulaajagassarpasuaqarpoq. Qularnanngilaq pitsaaqutitaqarlunilu pitsaanngequtitaqarpoq. Pitsaaqutaasinnaasut pitsaanngequtaasinnaasullu tamaasa sukumiisumik paasilluaqqaarusunnarput, siunertap anguniakkallu akuersissutigineqannginnarani.

Soorlu assersuutigiinnarluguluunniit § 1-mi siunertaq anguniagaqarlu qiviaannaraanni, qanoq isumaqarpa nipilersornerup silarsuaata iluani suliaqartunut? § 1-ip Inuiaqatigiinnut aningaasaqarnikkut iluaqusiisissamik piumasaqataasimasup naammassiuminaassinnaanera pissutigalugu tapiiffigineqanngitsoorsinnaaneq ernumassutigineqarsinnaava?

Nipilersortartut eqqumiitsuliortutut aamma taaneqartarput aamma eqqumiitsuliortut ataanniipput. Eqqumiitsuliortullu aningaasaateqarfippassuarnut assigiingitsunut qinnuteqarsinnaatitaapput; Nunafondenimut, Tips & Lottomidlernut, Kulturikkut aningaasaliissutinut kommuninut, Nordisk Kulturfondimut, Napa-mut assigiingitsorpasuarnullu qinnuteqartoqarsinnaavoq.

Eqqumiitsuliortuunertik pillugu qinnuteqarlutillu tapiiffigineqarsinnaapput, imaanngitsoq suliaat aningaasarsiutigineqarsinnaallunilu iluanaarutigineqarsinnaammat. Tassa taanna allaassutaa; uani massakkut pineqartumi taamaallaat aatsaat aningaasarsiutigineqarsinnaappat, iluanaarutigineqarsinnaappat, suliffinnik pilersitsiviusinnaappat aammalu inuiaqatigiinnut aningaasarsiornikkut iluaqutaaffigineqarsinnaappat aatsaat tapiissuteqartoqarsinnaalluni.

Assersuutigiinnarlugu immaq taamaallaat Atlantic Music-mut tamanna iluaqutaasinnaava? Atlantic Music nunatsinni, nunarsuattalu sinnerani tunisassiorsinnaalerumalluni siunnersortissaminik atorfinitsitsiniarluni atorfinitsitsinissaminut qinnuteqarsinnaava? Imaluunniit taava qanoruna siunertaqarluta nipilersornermi tunisassiortut uunga inatsimmut ilanngunniarsarigivut? Nipilersuutaarniarfiit, immiussisarfiillu kisimik uani pineqarpat? Imaluunniit nipilersoqatigiit soorlu Nanookkikkut, Small Time Giantsikkut, imaluunniit kikkulluunniit taalliortut erinniartullu aamma pineqarpat?

Taamaattumik taama oqaaseqarluta Aqqalu C. Jeremiassenip siunnersuutaa ataatsimiititaliamut susassaqartumut ingerlateqqipparput apeqqutit qulaani pineqartut sukumiisumik qulaajarneqarsinnaaqqullugit.

Qujanaq

In.in.

Peter Olsen